

اوننگ گوجری نیوز بولٹن 13 فروری 2026

\*\*\*\*\*

یوہ آکاشوانی جموں ہے نصرت تے محمد آصف تیں خبر سُنو۔

\*\*\*\*\*

## HEADLINES

- ۱۔ جموں کشمیر حکومت غو کہنو ہے کہ کے۔سی۔سی لون معاف کرن بارے کوئے وی منصوبو زیر غور نی ہے۔
- ۲۔ حکومت نے طبی تے خوشبودار بوٹاں نانہہ فروغ دین واسطے اک اعلیٰ سطحی کمیٹی تشکیل دتی ہے۔
- ۳۔ جموں کشمیر مانہہ گزشتہ 1 سال مانہہ کینسر بیماری گا 32 ہزار نوا معاملہ درج کیا گیا ہیں۔
- ۴۔ جموں کشمیر قانون ساز اسمبلی نے اعلان کیو ہے جے آئیندہ 16 فروری ناں اسمبلی مانہہ چھٹی رہ غی جد کہ باقی کم کاج دوبارہ 20 فروری نانہہ چلائو جے غو۔
- ۵۔ محکمہ موسمیات نے پیش گوئی کی ہے جے آئیندہ 17 فروری ناں جموں کشمیر غا گُج اچیرا پہاڑی علاقاں مانہہ درمیانہ درجہ غی برف باری ہوسکے۔

\*\*\*\*\*

## KCC LOAD WAIVER

جموں کشمیر حکومت نے اج قانون ساز اسمبلی مانہہ جانکاری دیتا واں دسیو ہے جے کسان کریڈٹ کارڈ سکیم غے تحت دتا گیا قرضہ ناں معاف کیا جان بارے حکومت غو موقوف نہیں ہے اس سلسلہ مانہہ آکاشوانی جموں گا مہارا نمائندہ نے جانکاری دتی ہے جے اج ایوان مانہہ ممبر اسمبلی ڈاکٹر دیوندر کمار منیال غی طرفوں ایوان مانہہ کے سی سی لون معاف کیا جان بارے پوچھیا گیا سوال گا جواب مانہہ حکومت نے واضح کیو ہے جے اس بارے کوئے وی منصوبو زیر غور نی ہے۔ اج ایوان مانہہ کساناں غی بلائی بہتری تے زراعت بارے محکمہ گا وزیر جاوید احمد ڈار نے کہیو جے اجیں توڑی اس معاملہ بارے مہاری حکومت گو کوئے موقف نی ہے۔

\*\*\*\*\*

## JK GOVT AROMATIC PLANTS

طبی تے خوشبودار پوداں غی کاشت نانہہ فروغ دین واسطے جموں کشمیر حکومت نے ایک اعلیٰ سطحی کمیٹی تشکیل دتی ہے۔ یہ کمیٹی پورا جموں کشمیر مانہہ اس شعبہ غی تجارتی ترقی واسطے مکمل تے مقررہ وقت آلا منصوبہ نانہہ تیار کرے غی۔ آکاشوانی جموں غا نمائندہ غے مطابق ، عام انتظامی محکمہ غی جانب تیں جاری سرکاری حکم مانہہ کہیو گیو ہے کہ طبی تے خوشبودار پوداں غی منظم ترقی تے فروغ واسطے اس کمیٹی غی منظوری دتی گئی ہے۔ حکم غے مطابق ، زراعت محکمہ گا ایڈمنسٹریٹو سیکرٹری اس کمیٹی غا چیئرمین وین گا۔

\*\*\*\*\*

## CANCER CASES

جموں کشمیر مانہہ 1 سال گا عرصہ غے دوران کینسر غی بیماری غا 32 ہزار نوا معاملہ باندے آیا ہیں جن وچوں 79 فی صد معاملن چہرا وادی کشمیر وچوں باندے آیا ہیں اس سلسلہ مانہہ اج ایوان مانہہ پی۔ڈی۔پی جماعت نال وابستہ ممبر اسمبلی وحید الرحمان پرا غی طرفوں پوچھیا گیا اکن سوال گا جواب مانہہ صحت بارے وزیر سکینہ اتو نے جواب دیتا وان ایوان نانہہ دسیو بے جے سن 2022 توں 2024 مانہہ وادی کشمیر مانہہ کینسر گا 25 ہزار 621 معاملہ درج کیا گیا تھا ، جد کہ 2023 تو 2025 توڑی جموں صوبہ مانہہ 6804 معاملہ درج کیا گیا تھا، وزیر موصوفہ نے ایوان نانہہ جانکاری دیتا وان دسیو جے ان معاملن مانہہ زیادہ تر پھیپھڑا تے چھاتی غا کینسر غا معاملہ درج کیا گیا ہیں۔

\*\*\*\*\*

## MED CONF RAJOURI

گورنمنٹ طبی کالج راجوری غا شعبہ زچہ و بچہ غی جانب تیں راجوری مانہہ پہلی واری گاینے کولاجی واسطے قومی سطح غی میڈیکل کانفرنس انتردرشٹی 2026 منعقد کی جارئی ہے۔ ملک گا بکھ بکھ حصاں تیں مشہور گائناکولوجسٹ تے طبی ماہرین اس کانفرنس مانہہ شریک ہو رہیا ہیں۔ اس پروگرام مانہہ سائنسی سیشن ور کشاپ مباحثہ تے پریزنٹیشن شامل ہیں جن غو مقصد خواتین واسطے صحت غی سہولیات نانہہ بہتر بنانو ہے۔ میڈیکل طلبہ نانہہ وی اس کانفرنس تیں فائدو وے غو ، کیونجے انہاں نانہہ ماہرین ڈاکٹراں تے نوی تکنیک ، جدید معلومات تے عملی تجربو سیکھن غو موقعو لبے غو۔ اس بارے مزید گل کرتا وان ایچ۔او۔ڈی گاینٹ ڈاکٹر چندر شیکھر نے اس طرح کہیو۔۔۔۔۔

\*\*\*\*\*

## DC SAMBA AMBULANCE

دور دراز علاقن مانہہ صحت غی سہولیات نانہہ بہتر بنان واسطے ضلع سامبہ غی ڈپٹی کمشنر آیوشی سودن نے اج محکمہ صحت نانہہ مکمل سہولیات تیں لیس ایمولینس فراہم کی۔ یاہ ایمولینس کانداری بیورایج لمٹیڈ غا سامبہ یونٹ غی کارپوریٹ سوشل رسپانسبلٹی سکیم غے تحت دتی گئی ہے۔ یاہ، گڈی چیف میڈیکل آفیسر سامبہ ڈاکٹر ودھی بھائیال غے حوالے کی گئی۔ جنہاں نے اس تعاون ور شکر یو ادا کیو۔ یاہ ایمولینس ہنگامی طبی خدمات نانہہ بہتر بنان واسطے استعمال کی جے غی۔ آکاشوانی گا خبراں آلا شعوبہ سنگ گل کرتا وان، ڈی۔سی سامبہ نے اس طرح کہیو۔۔۔۔۔ تے سی۔ایم۔او ، سامبہ نے اس بارے مزید اس طرح کہیو۔۔۔۔۔

\*\*\*\*\*

## STUDENT'S VISIT

عالمی یوم ریڈیو غا موقع ور جموں سنسکرت سکول غا طلبہ غا ایک گروپ نے اج آکاشوانی جموں غو دورو کیو۔ طلبہ نے آکاشوانی غا مختلف شعبہ غو دورو کیو، جن مانہہ پراگرام منگ سیکشن، کنٹرول روم ، سٹوڈیو ، انتظامی شعبہ تے ریجنل نیوز یونٹ شامل ہے۔ اس دوران طلبہ نے خبراں گا سربراہ، این گلشن رینا تے دیگر عملہ غے نال مفید گفتگو وی کی۔

\*\*\*\*\*

## ASSEMBLY OFF DAY

جموں کشمیر قانون ساز اسمبلی نے اعلان کیو ہے ،کہ ایوان مانہہ سب غی رائے تیں بعد یوہ فیصلو ہوو بے کہ سوموار 16 فروری 2026 نانہہ اسمبلی غی

چھٹی وے غی۔ آکاشوانی جموں گا نمائندہ غے مطابق اسمبلی سیکرٹریٹ گا جاری  
بلٹین مانہہ کہیو گیو ہے کہ 16 فروری واسطے مقرر کم ہُن 20 فروری 2026 نانہہ کیا  
جیں گا، یوہ علان، ایوان غا فیصلہ غے مطابق کیو گیو ہے۔

\*\*\*\*\*

## ARMY CMDR SEC REVIEW

فوج غی شمالی کمانڈ گا سربراہ لیفٹیننٹ جنرل پرتیک شرما نے دہشت گردی غو  
مُنہ توڑ جواب دین تے حفاظت نانہہ یقینی بنان غی کاطر ادھمپور مانہہ فوج تے  
دوجی حفاظتی ایجنسیاں غی اک سانجی میٹنگ غی صدارت کی ہے۔ اس سلسلہ مانہہ  
آکاشوانی جموں واسطے ادھمپور تیں مہارا نمائندہ نے جانکاری دتی ہے جے فوجی  
کمانڈر نے ویڈیو کانفرنس غے ذریعے اس میٹنگ غی صدارت کی جس دوران  
جموں کشمیر پولیس، سی۔آر۔پی۔ایف تے دوجی حفاظتی ایجنسیاں غا اعلیٰ عہدے داران  
نے شمولیت کی نمائندہ نے دسیو ہے جے میٹنگ غے دوران دہشت گردی غا خاتمہ  
غی خاطر سخت اقدام چان غی ضرورت ور زور دتو گیو ہے۔

\*\*\*\*\*

## SHOBHA YATRA

جموں ٹریفک پولیس نے 14 فروری نانہہ مہاشوراتری تیں پہلاں کڈی جان آلی شوبھا  
یاترا غے پیش نظر ٹریفک بارے ہدایت جاری کی ہیں۔ یاہ یاترا شری  
رنبیریشور مندر تیں شروع وے غی تے شہر غا بکھ بکھ رستاں تیں گزرتی وی  
دوبارہ مندر ور ختم وے غی۔ حکام غے مطابق سویرے 10 بجے تیں یاترا غا رستہ  
ور ٹریفک پابندی نافذ وین گی پیش ہے اس بارا مانہہ مارا ضلع نمائندہ غی یاہ  
رپوٹ۔۔۔۔

\*\*\*\*\*

## SHIVRATRI KP TOWNSHIPS

جموں کشمیر مہاجرین امداد کمشنر، ڈاکٹر اروند کاروانی نے آن آلا مہاشوراتری  
تہوار واسطے جموں کشمیر مانہہ کشمیری پنڈت ٹاون شپ مانہہ مکمل انتظامات غو  
اعلان کیو ہے۔ انہاں نے کہیو کہ تمام متعلقہ محکمہ مل غے کم کر رہیا ہیں۔ تانجے  
تہوار پُر امن تے آسان طریقہ سنگ مٹایو جاسکے۔ مہاجر کیمپاں مانہہ لوکاں غی  
تہوار تیں متعلق ضروریات نانہہ پورو کرن واسطے خصوصی سٹال لایا جارہیا ہیں  
۔ انہاں نے مزید دسیو کہ کیمپ کمانڈنٹس نانہہ ہدایت دتی گئی ہے کہ وہ خود ا  
انتظامات غی نگرانی کریں، تے وقت ور تمام سہولیات فراہم کریں۔ انہاں نے مزید  
اس طرح کہیو۔۔۔۔۔

\*\*\*\*\*

## SNOW MARATHON

ضلع انتظامیہ ڈوڈہ نے بھارتیہ فوج غی 4 راشٹریہ رائفل تے بھدرواہ ترقیاتی اتھارٹی  
گا تعاون نال آئندہ 16 فروری ناں شہید جوانان غی خاطر ایک خصوصی دوڑ غو  
اہتمام کیو ہے واضع رہ جے برف غی موجودگی آلی جگہ مانہہ 5 کلو میٹر غا  
چھنڈا آلی یاہ دوڑ بھدرواہ غا چننا علاقہ توں جے گاٹی توڑی لوائی جے غی۔ یاد  
رہ جے اس دوڑ غو مقصد شہید ہوا فوجی جوانان ناں وقار بخش غے حُب الوطنی  
غا جذبہ نانہہ ظاہر کرنو ہے۔

\*\*\*\*\*

## WEATHER

محکمہ موسمیات نے جانکاری دیتا واں پلک یعنی 14 تے 17 فروری نانہہ کُج اُچیرا پہاڑی علاقان مانہہ درمیانہ درجہ غی برف باری غی پیشن گوئی کی ہے۔ جد کہ زیادہ تر علاقان مانہہ آئیندہ 25 فروری توڑی موسم خشک رہن بارے جانکاری دتی گئی ہے اس سلسلہ مانہہ محکمہ موسمیات نے احتیاطی طور ور سفر کرن بارے صلاح دیتا واں کہیو ہے جے وے آپنو سفر شروع کرن تیں پہلاں مقامی محکمہ موسمیات نال رابطو قائم کرلیں۔ اس سلسلہ مانہہ محکمہ موسمیات غا ڈائریکٹر مختار احمد نے مزید جانکاری دیتا واں اس طرح کہیو۔۔۔۔

\*\*\*\*\*